

समां - 12:25 hrs.

<><><><><><>

Manoj Sinha-Holy Relics

उपराज्यपाल मनोज सिन्हा काल्मिकिया गणराज्य दी राजधानी एलिस्टा च भगवान बुद्ध हुंदे पवित्तर अवशेषें दी प्रदर्शनी दे परैन्त उनेंगी भारत वापिस औहन्ने लेई रुस च न। एह अवशेष गेडेन शेडुप चोइकोरलिंग मठ च स्थापित न- जिसी “शाक्यमुनि बुद्ध हुंदे स्वर्ण निवास” दे नां कन्नै पंछानया जंदा ऐ। बुद्ध हुंदे पवित्तर अवशेषें पर श्रद्धांजलि अर्पित करने दे परैन्त मीडिया कन्नै गल्लबात करदे होई मनोज सिन्हा होरें काल्मिकिया च पवित्र अवशेषें दी प्रदर्शनी नै भारत ते रुस दे बश्कार लोकें च आपसी सरबंध्यें गी होर मजुबत कीता ऐ। उनें इस आयोजन गी ऐतिहासिक मौका दस्सदे होई आखेया जे यूरोप दे इक्कले बौद्ध समुदाय-कालमीक लोकें आस्तै एह आस्था दी ऐतिहासिक वापसी दा प्रतीक ऐ।

<><><><><><>

CM Statehood

मुख्यमंत्री उमर अब्दुल्ला होरें आखेया जे जम्मू-कश्मीर गी एहदा राज्य दा दर्जा तौले बहाल होना लोइचदा। श्रीनगर च इक प्रैस कांफ्रेंस गी सम्बोधत करदे होई मुख्यमंत्री होरें आखेया जे इक चुनी गेदी सरकार दे सशक्तिकरण ते उसी पूरे इख्तयार देने च चिर लग्गना, उसी चुनने आहले लोकें कन्नै बेन्यायी ऐ ते एह संसद ते सुप्रीम कोर्ट च कीते गेदे वायदें दी बी वायदा खलाफी ऐ।

उनें केन्द्र सरकार आसेया कीते गेदे वंरु वायदे दी प्रक्रिया दा चेता नोआया जेहदे च नमें सिरेया हद्दबंदी, चुनां ते राज्य दा दर्जा ब्हाल करना शामिल ऐ। उनें आखेया जे इनें वंरु वायदे दी प्रक्रिया दे पैहले दो कदम ते कामयाबी कन्ने पुट्टी लैतै गेदे न ते हून समा ऐ त्री गै पुट्टने दा।

<><><><><><>

Speaker BAC

जम्मू-कश्मीर विधानसभा दे स्पीकर अब्दुल रहीम राथर होरें सदन दी कारवाई मतल्लक 8 मिम्बरी सलाहकार कमेटी नामजद कीती ऐ। स्पीकर अब्दुल रहीम राथर हुंदी अध्यक्षता आहली इस कमेटी दे बाकी मिम्बरें च विपक्ष दे नेता सुनील कुमार शर्मा, अली मोहम्मद सागर, मुबारक गुल, मोहम्मद युसुप तारीगामी, गुलाम अहमद मीर, सज्जाद गनी लोन, मीर मोहम्मद फय्याज ते चौधरी मोहम्मद अकरम शामिल न। इस कमेटी दी जिम्मेदारी विधानसभा दे औंदे इजलास दौरान कम्मे-कारवाइयें दी दिक्ख-सुन करना, ओहदी प्रक्रिया पर तक्क रखना ते कम्म-बवस्था आहले ढंगै सिर चलाने लेई सब्भनै मिम्बरें बश्कार तालमेल बनाना ऐ।

<><><><><><>

Gulchain Singh

जम्मू-कश्मीर दे मन्ने-परमन्ने दे सियासी नेता ते साबका मंत्री गुलचैन सिंह चाढ़क हुंदा कल मंडल च खीरी संस्कार करी दिता गेय। जम्मू च शुक्रवारें उन्दा लम्मी बमारी मगरा काल होई गेया हा, ओह 83 बरे दे हे।

चाढ़क होरें 2005 थवां 2008 तगर गुलाम नबी आजाद हुंदी अगुआई आहली सरकार च मंत्री दे तौर पर अपनियां सेवा दितियां। उन्दा काल होई जाने पर कैई सारे मन्ने-परमन्ने दे लोकें समाजी संस्थाएं अपना दुख ते बसोस प्रकट कीता।

<><><><><><>

J&K Railway

भारतीय रेलवे दे जम्मू डिविजन नै टिकट जांच आहली इक मुहीम गी चलाया ते 673 यात्रियें पर जुर्माना लाया ते 5 लक्ख रपे दा जुर्माना किट्ठा कीता। एह अभियान जम्मू, पठानकोट कैंट, पठानकोट शैहर, कटरा, श्रीनगर ते बडगाम च चलाया गया। Senior Divisional Manager Unit Singhal होरें यात्रियें गी सलाह दिती जे ओह M-UTS दा इस्तेमाल करन ते Rail One App दा इस्तेमाल टिकट बुक करने लेई करन।

<><><><><><>

UP Deepotsav

उत्तर-प्रदेश दी पवित्तर अयोध्या नगरी नौमें दीपोत्वस दे भव्य आयोजन आस्तै पूरी चाली तयार ऐ। भगवान श्री राम दी घर वापसी दी खुशी च अज्ज शामी अयोध्या नगरी दीयें कन्नै रोशन होई जाग। पूरे शैहर च 26 लक्ख शा मते दीयें जलाइयै पिच्छले बरे दा रिकार्ड तरोइने दी तयारी कीती गेदी ऐ। इस बरै राम दी पौड़ी सन्नै 56 घाटें पर मिट्टी दे दीयें दी रोशनी च पवित्तर सरयू दरिया पर इक दिव्य नजारा होग। एह दीपोत्सव विश्व मंच पर अयोध्या दे आध्यात्मिक ते सांस्कृतिक वैभव गी दर्शाग।

एह आयोजन मकामी प्रशासन-सांस्कृतिक संगठनों और डाक्टर राम मनोहर लोहिया अवध विश्वविद्यालय दे सैहयोग कन्नै आयोजित कीता जा रदा ऐ। इस विशाल आयोजन च 10 जहार शा मते लोक शामिल होंगन।

<><><><><><>

Tawi Golf Course

जम्मू तवि गोल्फ कोर्स Monsoon Tee off Diwali Cup 2025 दी मेजबानी लेई पूरी चाली त्यार ऐ। इसदा सरिस्ता सैलसफा निदेशालय जम्मू आस्सेया सैलसफा सचिव सी.पी. वर्मा हुंदी दिक्ख-रिक्ख च कीता जा रदा ऐ। एह कार्यक्रम अज्ज दपैहरी इक बजे शुरु होग ते एदे च 90 थवां 100 गोल्फ खडारी हिस्सा लै रदे न। इसदा समापन जेतुएं च ईनाम बंडने, राती दी रुट्टी ते Qawali Night दा सरिस्ता कीता जाग। Tawi Golf Course जम्मू दे सचिव Manav Gupta होरें आखेया जे एह आयोजन एकता ते जम्मू-कश्मीर च बददी गोल्फ संस्कृति गी मनाने लेई कीता जा रदा ऐ।

<><><><><><>

Chenani Inspection

लोकें दी सुरक्षा ते साफ-सफाई गी यकीनी बनाने लेई चनैनी बजार दे प्रशासनिक अधिकारियें व्यापक जायजा लैता। एस.डी.एम डाक्टर रंजीत सिंह कोतवाल, तहसीलदार पंकज सिंह ते टीम नै मठेआइयें आहली दुकानें, मैडिकल स्टोर ते खाने-पीने आहली थाहरें दा जायजा लैता। दुकानदारें गी मोमी लफाफे दे इस्तेमाल ते प्रतिबंधित दोआइयां बेचने खिलाफ सौहगा कीता गया।

अधिकारियें गैर-कनूनी तौर पर कीते गेदे कब्जें, बारे बी कारवाई कीती ते दुकानदारें गी
हिदायत कीती जे ओह अपना समेयान अपनी दुकान दे अंदर गै रक्खन।

<><><><><><>